

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Munir. A. Azim (atba)

10 Janvier 2020

14 Jamadi'ul Awwal 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

La Promesse d'Allah au Prophète & à bane Oroyants

يَا أَيُّهَا الَّذِينَ ءَامَنُوا تَوْبُوا إِلَى اللَّهِ تَوْبَةً نَّصُوحًا عَسَىٰ رَبُّكُمْ أَن يُكَفِّرَ عَنْكُمْ سَيِّئَاتِكُمْ وَيُدْخِلَكُم جَنَّاتٍ تَجْرِي مِن تَحْتِهَا الْأَنْهَارُ يَوْمَ لَا يُخْزِي اللَّهُ النَّبِيَّ وَالَّذِينَ ءَامَنُوا مَعَهُ نُورُهُمْ يَسْعَىٰ بَيْنَ أَيْدِيهِمْ وَبِأَيْمَانِهِمْ يَقُولُونَ رَبَّنَا أَتِمِّمْ لَنَا نُورَنَا وَأَغْفِرْ لَنَا إِنَّكَ عَلَىٰ كُلِّ شَيْءٍ قَدِيرٌ

Yaaa - 'ayyuhallaziina 'aamanuu tuubuuu 'ilallaahi Tawbatan - Nasuuhaa: 'asaa Rabbukum 'ayy - yukaffira 'ankum sayyi - 'aatikum wa yud - khilakum Jannaatin - tajrii min tahtihal - 'anhaaru Yawma laa yukhzillaahun - Nabiyya wallaziina 'aamanuuu ma-'ah. Nuuruhum yas - 'aabayna 'aydiihim wa bi-'aymaanihim yaquuluuna "Rabbanaaa 'at-mim lanaa Nuuranaa waghfir lanaa: 'innaka 'alaa kulli shay 'in - Qadiir."

« Ô bane croyants [Ô bane ki fine amène Imaan], tourne vers Allah en repentir sincère. C'est possible ki ou Maître efface ou bane mauvaises actions et faire ou entre dans bane jardins avec bane la rivières ki couler au milieu. Jour kot Allah pas pou donne le prophète et bane ki ena la foi avec li aucaine déshonneur ; zot lumière pou avancer devant zot et lors zot la main droite, et zot pou dire : 'Ô nous Maître, perfectionne nous lumière pou nous et pardonne nous, parski c'est Toi ki ena pouvoir lor tout kitchose.' » (Surah At-Tahrim 66 : 9)

À la lumière de sa verset Quran là, mo mette ene Hadith devant zot kot Hazrat Abu Zarr et Hazrat Abu Darda (ra) rapporter ki Hazrat Muhammad (saws) fine dire ki : *Le Jour du Jugement mo pou reconnaître mo peuple.* Bane Sahaba fine demander : *Ô prophète d'Allah, couma eski ou pou reconnaître ou peuple ?* Hazrat Muhammad (saws) fine dire ki : *Mo pou reconnaitte zot par la lumière ki ena devant zot.*

Donc, ena dimoune dans le monde ki ena la lumière de *Imaan* (la foi) avec zot et le Jour du Jugement sa la lumière là pou devant zot et à zot droite.

Kan ou lire Surah La Lumière, c.à.d., Surah Al-Nur Verset 56, kot Allah (swt) dire:

« Allah fine promette bane parmi ou ki ena la foi et ki faire le bien, ki Li pou place zot lors la terre comme So gérants (successeurs), couma Li ti faire avec bane ki ti vine avant zot ; et ki Li va renforci zot religion ki Li fine content donne zot, et ki Li va transforme zot crainte en sécurité. 'Zot adore Moi, et pas associer nannié avec Moi.' Bane ki refuse gagne la foi après sa, zot vraiment suive chemin travers. »

Li fine toujours ene façon faire d'Allah, ene façon ki Li fine démontrer dépi l'existence de l'homme, kot c'est Allah (swt) même ki élève So Messenger Choisi, So Prophète, So Khalifatullah couma sa verset là fine faire nous comprend. Et Allah dire dans sa verset là ki sa c'est ene promesse ki Li faire à bane ki croire et faire bon actions. Sa promesse là, Allah pas fine faire sa à tous dimounes ki zot actions pas plaire Li, ki zot actions contre So l'enseignement et séki important là-dans, Allah (swt) dire ki Li pou faire zot bane successeurs (So bane *Khalifa*) lors la terre ; c'est pas ene *Khalifa* ki élire par l'homme, kot dimounes assizer ensam pou faire élire ene *Khalifa*, kot ena toute sorte qualité dimounes, toute sorte qualité mentalités et certainement c'est Allah (swt) seul ki conne le cœur de tous

dimounes. C'est sa ki Li prend sa l'engagement là et faire sa promesse là ki c'est Li, Allah (swt) même ki pou élève So bane successeurs lors la terre, pareil couma Li fine établir bane successeurs parmi bane ki ti ena avant zot; et ki Li pou établir pou zot, zot religion ki Li fine choisir pou zot et Li pou donne zot en retour sécurité et la paix, après zot frayeur.

Kan ou lire sa verset là, li vine pli intéressant façon ki Allah (swt) fine rendre sa verset là et faire nous comprend, kot Li fine dire, pareil couma Li fine faire bane successeurs parmi bane ki ti vini avant zot. Donc, li bien claire, sa bane successeurs là, c'est pas bane ki fine choisir par l'homme, ni choisir lors ene board ou panel, kot faire ene élection, choisir n'importe ki pou mette là comme ene successeur. Kan Allah (swt) faire sa promesse là, c'est Li ki prend toute la responsabilité pou élève So Successeur Choisi et élève li avec le Saint Esprit, le « *Rouhil Qouddous* ». Sa c'est façon faire Allah, ene façon ki Li fine démontrer dépi l'existence de l'homme, ki c'est Li-même ki choisir So Serviteur (pas l'homme) et Allah vine ene aide à So bane prophètes (ou couma ou capave appelle li : So bane serviteurs choisi, So bane prophètes ou messagers, So Khalifatullah etc.), et donne zot supériorité. Allah (swt) dire dans Quran dans Surah Al-Mujadala, Chapitre 58, Verset 22.

« Allah fine décréter : 'Moi et Mo Messenger, c'est nous ki vraiment pou triompher... »

Triompher, prévaloir ou prédominance capave décrire comme suite : Li tous les temps le désire fervent de tous bane prophètes ki bane arguments en faveur d'Allah établi fermement lors la terre dans ene tel façon ki personne pas capave réfute zot. Alors avec bane grand signes, Allah manifester zot vérité et de par la main de sa bane prophètes là, Allah sème la grain de la droiture ki bane là envie fanner partout. Mais seulement Allah (swt) pas complète mission de bane prophètes de zot la main même, mais au contraire Allah (swt) donne zot la mort dans ene tel circonstance et dans ene tel l'époque ki paraitre comme si zot fine échouer dans zot mission. Sa donne bane opposants l'occasion pou ridiculise zot. Mais après ki sa bane opposants là fine bien riyer, Ierlà Allah envoie ene lotte manifestation de So pouvoir et Li crée ene série de circonstances ki éventuellement amène vers réalisation de l'objectif de sa bane prophètes là. C'est-à-dire, Allah manifester So pouvoir deux fois : Premièrement, pendant la vie de So bane prophètes et à travers zot bane travaux, Allah (swt) montrer le pouvoir

de So la main. Deuxièmement, après la mort de So prophète, bane disciples de sa prophète là subir toute sorte de difficultés. Bane l'ennemi gagne la force et commence croire ki mission prophète là fini là-même. Zot même penser ki bane disciples là aussi pou alle détruire. Ena même bane membres de sa mouvement (Jamaat) là ki commence ena doute comme-ci zot le dos fine casser. Ena quelques malheureux ki même renier sa prophète là. Lerlà Allah (swt) montré So pouvoir et So capacité et Li sauve sa communauté ki ti dans difficulté là. Alors bane ki persévérer jusqu'à la fin, zot vine témoin de sa miracle d'Allah, le Tout Puissant là.

Sa li pareil couma ti arriver dans l'époque de Hazrat Abu Bakr (ra). La mort de Hazrat Muhammad (saws) ti considérer comme inapproprié et plusieurs bane Bédouins ignorants fine renier Hazrat Muhammad (saws). Bane compagnons de Hazrat Muhammad (saws) ti remplie de tristesse. Dans sa bane moments critiques là, Allah (swt) fine faire ki Hazrat Abu Bakr (ra) tenir ferme et à travers li Allah fine montrer ene manifestation de So pouvoir. Sa deuxième manifestation de pouvoir là li vaste.

Donc, sa deuxième manifestation de pouvoir d'Allah là c'est ki après la venue de Nabi Kareem (saws), fine ena bane *Khulafa-e-Rashideen*, bane *Mujaddids*, et puis le Messie Promis Hazrat Mirza Ghulam Ahmad (as) du siècle passé, et avant cent ans de so mission, Allah (swt) fine élève Hazrat Musleh Ma'ud (ra), et dans sa siècle présent là aussi ena ene Musleh Ma'ud, kot Allah (swt) conne très bien couma bane l'enseignements Divine fine piétiner à travers bane dimounes ki assoiffés de pouvoir et de l'établissement de zot dynasties.

Au début de sa siècle là Allah (swt) fine élève So Khalifatullah, ene tel Khalifatullah ki Allah fine établi après ene prophète porteur de Loi Divine, c'est-à-dire, Hazrat Muhammad (saws). C'est lors sa système là ki l'islam so progrès et victoire dépanne kot pou faire revivre sa **Sahih Al Islam** (vraie l'enseignement de l'islam) là et sa c'est ene system béni parski li élevé par Allah (swt) Li-même, pas par l'homme couma ena croire (ki à travers élection ki passé par vote et élire ene quelqu'un kan même sanlà-là pas recevoir aucaine révélation, inspiration ou message divine, ki vine dépi kot le Créateur).

Donc, kot Allah élève So Choisi, sa ki ene system béni et li ene reflet de l'apostolat et li ene garantie absolue de toute sorte de progrès. Donc, c'est ene sujet ki demande pas alle trop longue lor là, ki short [short but sweet], kot tous capave

bien comprend li, ti dose par ti dose et *Insha-Allah*, la semaine prochaine mo pou continuer lor sa même sujet là kot par la grâce d'Allah, Allah donne moi sa *Ilm* là.

ANNONCES :

Mo annonce zot, la triste nouvelle du décès de Madame Razia Hariz, ki ti la femme de nous Naib Amir Hariz Sahib de Alappuzha (Allepey). **Inna Lillaahi wa inna ilayhi raajeeoune.**

Le 08 janvier 2020, kan mo fine lever pou le Namaz Tahajjud, sa verset là fine vine plusieurs fois lors mo la lèvres: **Inna-lillaahi wa inna ilayhi raajeeoune.**

Kan mo fine fini fer mo Wu'zu, sa verset là fine vini plusieurs fois au lieu de *duah* après *Wu'zu*. Mo fine alors compran ki pou ena bane mauvais nouvelles, bane tracas, bane tristesses et même bane difficultés.

Puis, le matin même, mo fine gagne ene nouvelle triste concernant ene sujet et le soir, après Namaz Maghrib, mo fine recevoir triste nouvelle de la mort de Razia Hariz Sahiba.

Li ti bien malade couma mo ti faire l'annonce plusieurs fois dans mo bane Khutba Jummah. Li ti âgé de 56 ans. Et so date de naissance li historique, parski li fine né ene 10 Mars [le 10 Mars 1963], et c'est ene 10 Mars même ki nous Jamaat Ul Sahih Al Islam ti enregistrer officiellement ici à Maurice et d'envergure international. Li fine décédé le 08 Janvier 2020 à 5pm (heure locale là-bas), et c'est so missié même, nous Naib Amir Hariz Sahib ki fine lead so Namaz Janaza le lendemain [le 09 Janvier 2020] à 10.00 le matin et li fine enterrer à 12.30 (heure locale là-bas).

Li laisse derrière li so missié et so deux zenfants, Firoz Ahmad Sahib et Roshni Sahiba. **Li ti aussi nous premier Sadr Sahiba du Siraj Makin de Kerala.** Li ti ene madame très sincère dans la Manifestation Divine et li ti régulièrement en contacte avec moi. Li ti ene dame ki fine passe par beaucoup épreuves dans so la vie. C'est ene l'honneur pour moi et pour mo la famille ki nous fine réussi visite li dans so la caze pendant nous premier visite à Kerala en 2017. Li ti toujours souriant, gentil, aimable et ena beaucoup l'amour pour Allah, So Khalifatullah et le *Deen-e-Islam*.

Mo tenir à remercier tous mo bane disciples du Jamaat Ul Sahih Al Islam [dans différents places dans l'Inde : Kerala & Tamil Nadu] ki fine solidaire ensam avec nous Naib Amir Hariz Sahib et so bane zenfants dans sa moment d'immense tristesse là, et surtout mo remercier le Jamaat Ahmadiyya de Kerala ki pas fine hésiter pou donne ene coup de main dans sa *Mayyat* là. Zot fine applique sa vrai motto là : **Love for All, Hatred for None** [*L'Amour pour tous, La Haine pour personne*] et zot fine délaisse le boycott pou applique bane vrais l'enseignements de l'Islam. Zot pas fine faire couma le Jamaat Ahmadiyya de Maurice, kot mo bizin dire, mo bane propre blood relations fine mette boycott. *Masha-Allah*. C'est coumsa ki nous bizin vivre, couma bane frères et sœurs d'ene sel *Deen*, l'Islam.

Insha-Allah, après *Salat-ul-Jummah*, nous pou faire le *Namaz Janaza Ghaib* de Razia Hariz Sahiba. Ki Allah fer li *Mubarak* dans le *Jannat-ul-Firdaws*, So *Jannat* le plus proche de Li (Allah), et parfaire so lumière pou li (Razia Sahiba) pour tous so bane sacrifices ki li fine faire et pour so l'attachement à la Manifestation Divine de sa siècle là. Ki Allah répanne lors li So l'amour, et miséricorde et accorde li la paix et la sérénité éternelle. *Ameen*.

Ki Allah donne courage et patience à nous Naib Amir Hariz Sahib et so bane zenfants dans sa moment de malheur là et ki Allah accorde zot la lumière de So proximité, So miséricorde et fer zot resplendir dans le *Deen-e-Islam* avec sincérité et *Taqwa* pareil couma Razia Hariz Sahiba et bane *Sahaba* sincères de la Manifestation Divine depuis la création de sa les ciels et la terre là. *Ameen, Summa Ameen, Ya Rabbul Aalameen*.